

Cambia el so ordene

Tute le cose

Se cata l'ostreghe

Drento le nose;

Nasce tartufole

Sora i palazzi;

Canta le racole

Drento i pagiazzi;

Zira sonamboli

Tuta la note;

Va i gufi a sconderse

Ne le so grote;

.

Schiopa magioliche;

Se rompe spechi;

Le catarigole

Ghe vien a i vechi;

Ruza le masene;

Ciga i molini;

Se fa invisibili

Dopie e zechini;

.

La forfe mastega;

Sbrega el cortelo;

L'ago no penetra;

Ponze el scarpelo;

Subie e verigole

Più no trapana;

Ne i campi fertili

Nasce la cana;

Deventa ruzene

L'oro e l'arzeno;

Se scola i arpesi;

Se vede el vento ec. ec.